

## TSHISHINA KA NATIKUT

Etuat Rich

Nateu nenua eshkuakushuniti kuna.

— Ume ma, iteu (uitshi-auassa nenua, uitshi-ussinitshishua nenua, nipau ne). Ume ma, iteu, ka ui shikatimitak<sup>u</sup>, etikashukut pishimua.

Uepuepinishtameu.

— Ek<sup>u</sup> ma, iteu, shikatiminan, ek<sup>u</sup> ma minuat shikatiminan ka ui shikatimiat.

Ekue tshitutikut nenua kuna.

— Eshk<sup>u</sup> minuat nika takushin, itiku, tshe ishin ma takushiniani minuat.

Ek<sup>u</sup> apu nutshikuat katshi itikut. Kushtatshimiku nenua.

Eshpish ma anite tat, napinnit ek<sup>u</sup> miautat piminu. Miautat piminu, eshpish nepatashiti tshekuannu, eukuannu nenu piminu miautat kassinu. Ek<sup>u</sup> tshek pepunnit, at akua-pipunnit, ek<sup>u</sup> pietuenaminiti auennua utshipishkuamit. Ekue nuteiashkueiminiti. Auennua nenua, nasht uapishinua ! Ekue pitutetishauat, nete akamishkutet itishaueu, ekute epiniti. Ekue nitshikutshinnit nenu uitshuau. Ekue ashtueniti (mita kutuatshepan), ekue ashtueniti nenua umitima eshpish tshishinnit.

— Pishkutueietshi ! iteu nenua utishkuema kie nenua utauassima, peikussinua, pishkutueietshi !

Ekue natak nenu upimim, anite eshtat, ek<sup>u</sup> kuetuenikatuat. Eukuannu muk<sup>u</sup> katshi unatenit nenu upimim.

Tshek tapue apashunua nenua mishkumia. Iapashuniti, ek<sup>u</sup> tshitshue  
kuetuenikatuat, muk<sup>u</sup> aiat minukatenu upimim. Tshek  
ekuana keupanniti tapue (nete shamatapinipani). Ekue utinat.  
Katshi kupanniti, ekue papikushikuauat at. Ekue tetanat anite  
ukatshishapissiteshimit, anite utishkutemit. Ekue apashikushuat. Katshi  
apashikushuat, ekue apatenit uitshuau nutim. Tshekat meshtikasham<sup>u</sup> upimim.

Shash.